

## KULAANI VIKALI UBAGUZI NA UNYANYASAJI ULIOFANYWA NA JESHI LA POLISI DHIDI YA WANAHARAKATI

Mtando wa #WenyeNchiWananchi unaohusisha wananchi mbalimbali wakiwemo wanaharakati inalaani vikali vitendo vya ubaguzi na unyanyasaji vilivyofanywa na jeshi la polisi dhidi ya wanaharakati na wasomi waliofika Mwanza kwa ajili ya Kongamano kuhusu Katiba Mpya na kupinga mkataba mbovu wa DP World wa kuchukua bandari zetu (Kampeni #OkoaBandariZetu)

Kwa mujibu wa wajumbe kati ya tarehe 02 hadi 04 Oktoba 2023, wao binafsi na wahusika mbalimbali wakiwemo watoa huduma walinyanyawa na kuhujumiwa kupitia vitisho vilivyofanywa na Jeshi la Polisi. Baadhi ya matukio makuu muhimu yalikuwa yafuatayo:

### 1. Hujuma ya ukumbi wa kwanza wa Youth Center.

Baada ya maandalizi ya awali kukamilika timu ya Sauti ya Watanzania kwa kushirikiana na asasi ya kiraia iitwayo TRAFO walisafiri kwenda Mwanza kwa ajili ya kongamano hilo. Siku mbili (2) kabla ya kongamano polisi walianza kufika kwa mmiliki wa ukumbi ambaye waliingga naye mkataba na polisi walianza kumtisha. Masaa machache kabla ya kongamano kuanza, mwenye ukumbi aliandika baruwa ya kuvunja mkataba na kurudisha pesa bila kuweka sababu za msingi kusitisha huduma hiyo.

### 2. Hujuma ukumbi wa pili wa masista

Baada ya kukosa ukumbi wa kwanza wadau wa kongamano walilazimika kutafuta ukumbi mwengine kwa dharura na walipata ukumbi wa pili wa masista usiku wa manane na kisha kufanya malipo. Lakini masaa mawili kabla ya kongamano mwenye ukumbi hiyo alisitisha huduma kisha kurudisha pesa huku polisi wakizingira eneo hilo.

### 3. Kufukuzwa na makamu mkuu wa chuo cha SAUT Mwanza - Prof. Costa Mahalu

Mdude Nyagali, Dr. Wilbrod Slaa na Wakili Boniface Mwabukusi baada ya hujuma hizo walienda kupata huduma ya chakula katika mgahawa (Cafeteria) ya chuo kikuu cha St. Augustine University Of Tanzania ili kupata chakula wakati wakitafakari way forward. Cha ajabu wakiwa hapo makamu mkuu wa chuo hicho akiwa na watu wanaohiswa kuwa askari alitaka wadau waondoke eneo hilo haraka sana na hata walipomwambia kuwa waliagiza chakula hakutaka kukubali bali aliamuru waondoke kwa sauti ya ukali. Huu ulikuwa ni udhalilishaji na ubaguzi mkubwa na wa wazi mbele ya wanafunzi na wahadhiri walioshuhudia kitendo hicho.

4 . Hata hivyo baada ya kuondoka eneo hilo hakuna eneo lingine lililokubali kutoa huduma yoyote huku polisi waliokuwa wamevaa kiraia wakiendelea kuwafuata wadau wa kongamano kila hatua.

Tunasisitiza kuwa **Vitendo hivi viko kinyume na Katiba Ya Jamhuri ya Muungano wa Tanzania**

- Ibara ya 9 inaeleza wazi Lengo la Katiba ni kuwezesha ujenzi wa Taifa katika misingi ya kijamaa, undugu na amani na hivyo Mamlaka ya Nchi na vyombo vyake vyote vinawajibika kuelekeza sera na shughuli zake zote katika lengo la kuhakikisha usawa

---

*Ibara 9 g) kwamba Serikali na vyombo vyake vyote vya umma vinatoa nafasi zilizo sawa kwa raia wote, wake kwa waume, bila ya kujali rangi, kabila, dini au hali ya mtu;*

---

- Pia Vitendo vilivyofanywa na jeshi la polisi la kutishia watoa huduma na kuwapelekea kuwanyima huduma wananchi wenzetu inavunja Ibara ya 13 (4), (5) ya katiba inayokataza mtu kubaguliwa na sheria au kubaguliwa na mamlaka yoyote katika utekelezaji wa shughuli zake. Hii ni pamoja na kubagua kwa mujibu wa maoni yao ya kisiasa.

---

*13 (4) Ni marufuku kwa mtu yeyote kubaguliwa na mtu au mamlaka yoyote inayotekeliza madaraka yake chini ya sheria yoyote au katika utekelezaji wa kazi au shughuli yoyote ya Mamlaka ya Nchi.*

*(5) Kwa madhumuni ya ufanuzi wa masharti ya ibara hii neno “kubagua” maana yake ni kutimiza haja, haki au mahitaji mengineyo kwa watu mbalimbali kwa kuzingatia utaifa wao, kabila, pahala walipotokea, maoni yao ya kisiasa, rangi, dini, jinsia au hali yao ya maisha kwa namna ambayo watu wa aina fulani wanafanywa au kuhesabiwa kuwa dhaifu au duni na kuwekewa vikwazo au masharti ya vipingamizi ambapo watu wa aina nyingine wanatendewa tofauti au wanapewa fursa au faida iliyoko nje ya masharti au sifa za lazima, isipokuwa kwamba neno “kubagua” halitafafanuliwa kwa namna ambayo itaizuia Serikali kuchukua hatua za makusudi zenyelengo la kurekebisha matatizo mahususi katika jamii.*

---

Ileleweke kuwa uvunjifu huu wa Katiba na sheria za nchi ni mwendelezo wa ubabe, unyanyasaji na ubaguzi unaoendeshwa na serikali ya CCM chini ya Rais Samia Suluhu Hassan. Tunawakumbusha watendaji wote kuwa wao ni watumishi wa umma na shurti wafuate Katiba. Wakumbuke kuwa hakuna mtu yeyote aliye juu ya Katiba hata Rais wa Nchi.

***Imetolewa***

***05 Oktoba 2023***